

Swisscom duai restar en maun svizzer

Speculants avant porta

DA LUCAS DEPLAZES / ANR

■ **Dapi la separaziun da la PTT l'onn 1998 è liberalisada la Swisscom parzialmain. La confederaziun è obligada da tegnair almain 51% da las azias. Ella profitescha dal bun gudogn da Swisscom. Quai na plascha betg a tuts.** *Ruedi Noser* (pld/ZH) pretenda en ina moziun che la confederaziun na saja en l'avegnir betg pli obligada da disponer da la maioritad da las azias da Swisscom. Il cusseglier dals chantuns turtigais fa attent che Swisscom saja fetg dependenta da la tecnologia da l'exteriur per pudair modernisar sia rait da comunicaziun. Plinavant metta el en dumonda la rolla dal cussegl federal en sia funcziun da regulatur e da possessur. Noser vesa gist per las cassas da pensiun ina segira pussaivladad d'investir. 80 pertschient da la purschida da Swisscom sa cumponia oz da products che n'existevian betg avant entgins onns e quest svilup vegnia a cuntinuar. En l'avegnir stoppia Swisscom investir dapli en martgads che sa chattan en mauns privats, quai che muntia in grond ristg. Sia moziun lubeschia in svilup moderat.

Da muntada naziunala

Claude Hêche (pss/JU) fa attent al privel per il persunal en cas che la confederaziun disponiss mo pli d'ina minoritad da las azias. Per *Thomas Minder* (senza partida/SH) è Swisscom la vatga da latg per la confederaziun. Cumbain ch'el vesa l'avantatg da la fie-

ra liberalisada fa el dentant attent al grond privel davart dals speculants. La situaziun actuala garantescha ina gronda segirtad dal provediment. Swisscom investescha 20 milliardas francs en la rait da fibra da vaider (Glasfaser). Minder dubitescha ch'investurs esters avessan ils medems interess. Il privel è grond che Swisscom vegniss en mauns dals Americans u dals Chinois, han admonì plirs pledaders. Stadi ed armada è dependents d'in provediment fidà. Per *Konrad Graber* (pcd/LU) è Swisscom da muntada naziunala, ina mida da na saja beg inditgada.

Cussegliera federala *Doris Leuthard* ha punctuà che la situaziun actuala dettia a la regenza la pussaivladad da formular las finamiras strategicas per garantir in provediment da tut las regiuns cun ina rait moderna da comunicaziun. Swisscom è bain posiziunada sin il martgà liberalisà, ella è innovativa e sa drizza suenter ils novs basegns da la clientella. La Svizra dispona d'in dals megliers provediments. Pajais da l'Europa che han liberalisà totalmain lur interpresas da comunicaziun ston uss surpigliar tschertas prestaziuns d'utilitad publica.

En vista a la ferma opposiziun en la chombra da reflexiun retira Noser sia moziun. La fatschenta n'è dentant betg liquidada. En il cussegl naziunal ha inoltrà *Natalie Rickli* ina medema moziun. Quella vegn dentant ad avair naginas schanzas en il cussegl dals chantuns, sco quai che la debatta ha demus-